

08 NOV 1997

## NEGARA-NEGARA ASIA TENGGARA PERLU KURANGKAN PERGANTUNGAN TERHADAP DOLAR AS

KUALA LUMPUR, 8 Nov (Bernama) -- Negara-Negara Asia Tenggara sepatutnya menimbangkan untuk mengurangkan pergantungan terhadap dolar AS dan mempelbagaikan ke dalam mata wang yang lebih objektif dan kurang tidak menentu dalam tempoh jangka panjang, kata Setiausaha Agung Forum Perniagaan Asean Datuk Mohamed Iqbal.

Beliau berkata negara-negara di rantau ini sepatutnya menyambut baik pengenalan euro pada 1999 sebagai satu alternatif tidak bergantung terhadap dolar, apabila tindakan memasukkan rizab pertukaran asing antarabangsa akan mengurangkan kemudahruapan mata wang.

Cara lain yang boleh diteruskan adalah kerjasama rapat dengan Jepun dalam konteks pemegangan aset yen, katanya.

Setakat ini, mekanisme yang dicadangkan untuk berurusan dengan mata wang termasuk pengawasan rapi terhadap polisi ekonomi negara-negara anggota dan pengumpulan sumber-sumber kewangan dalam kemudahan pinjaman bagi menstabilkan mata wang.

Iqbal berkata Asean memerlukan rejim mata wang yang stabil untuk meliberalisasikan perdagangan dan pelaburan.

Bercakap dalam satu sidang akhbar mengumumkan persidangan dan pameran Inisiatif Kewangan Asean bagi Abad ke-21 yang akan diadakan di sini, bulan depan, beliau berkata apabila ekonomi saling bergantung meningkat akibat daripada kesan negatif dan positifnya juga turut meningkat."

Mengenai persidangan yang akan datang, Pengarah Eksekutif ABF Khoo Hock Aun berkata pameran dan persidangan itu akan diadakan di sini pada 1 Dis hingga 3 Dis bersempena dengan ulang tahun ke-30 Asean.

Persidangan itu dijangka menarik sekurang-kurangnya 400 peserta termasuk pengarah urusan Tabung Kewangan Antarabangsa (IMF) Michael Camdessus, Presiden Institut Kewangan Eropah W.Duisenbery, Pengerusi Lembaga Gabenor Eksekutif, Yayasan bagi Penyelidikan dan Maklumat Canggih (FAIR), Yuichiro Nagatomi dari Jepun dan pegawai-pegawai kanan dari Bank Dunia.

"Semua sembilan menteri kewangan Asean akan turut menghadiri persidangan itu dan terbabit dalam perbincangan panel yang dipengerusikan oleh Timbalan Perdana Menteri Datuk Seri Anwar Ibrahim di hari kedua persidangan," katanya.

Khoo berkata ABF juga mengundang menteri kewangan dari kumpulan G-15 serta menteri kewangan dari China, Jepun, Korea Selatan, Australia dan India untuk menyertai persidangan itu.

Perdana Menteri Datuk Seri Mahathir Mohamad dijangka akan merasmikan dan menyampaikan ucapan utama dalam persidangan itu. -- BERNAMA

HAK ZK OS